

## RECENZIJA

### „Stanje i kretanje kriminaliteta u Bosni i Hercegovini za punoljetne osobe u periodu od 2003. do 2012. godine“

U traženju odgovora na pitanje kako se uspješno suprotstaviti kriminalitetu uopšte u Bosni i Hercegovini, a posebno organizovanom kriminalitetu i terorizmu, istraživanje „Stanje i kretanje kriminaliteta u Bosni i Hercegovini za punoljetne osobe u periodu od 2003. do 2012. godine“, koje su obavili Hajrija Sijerčić-Čolić, Nikola Findrik, Vedad Gurda, Milijana Lepir, Dževad Mahmutović, Denis Pajić, Nezir Pivić, Ivana Stipanović i Vildana Vranj, je iznova pokazalo da to koliko ćemo biti uspješni ne zavisi od snalažljivosti ili sposobnosti pojedinaca, niti od prostog korištenja tuđih iskustava već prije svega od vlastitih iskustava, koja, zajedno sa tuđim, mogu rezultirati uspjehom. Istraživanje i dobijeni rezultati su pružili značajan doprinos u procjeni aktuelne situacije u pogledu strukture kriminaliteta i njegovog kretanja u vremenu nakon donošenja novog krivičnog zakonodavstva 2003. godine, i ukazali na neophodnost rasprave oko prikupljanja i vođenja statističkih podataka o kretanju kriminaliteta i potrebe usaglašavanja metodoloških pristupa u ovom važnom i osjetljivom području postupanja i djelovanja nadležnih u Bosni i Hercegovini. Pored toga, po mom mišljenju, ovo istraživanje je ukazalo i na neophodnost rasprave oko brže i daljnje reforme u oblastima materijalnog i procesnog zakonodavstva, te potrebe drugačijeg organizovanja tužilaštava, a koje će doprinijeti efikasnijem radu tog organa. Navedeno istraživanje ne daje odgovor na sva pitanja, neka od njih su sigurno vezana za kontinuirano povećanje broja novih pravosudnih organa i imenovanja sudija i tužilaca, kao i značajnog angažmana sudija i tužilaca u Bosni i Hercegovini u postizanju pune efikasnosti krivičnog pravosuđa. Međutim, ono će sigurno ohrabriti sve buduće istraživače da se sa mrtve tačke pokrenu istraživanja o kretanju kriminaliteta u Bosni i Hercegovini, i utvrdi da li je rastući broj istraga, a i podignutih/potvrđenih optužnica zaista u porastu i rezultat povećane stope kriminaliteta i ako jeste što je uzrok takvog kretanja kriminaliteta, a u svrhu razvijanja i poduzimanja različitih mehanizama koji bi, preventivno ili represivno, djelovali na suzbijanje ove društveno negativne pojave. Ovim istraživanjem se otvaraju vrata različitim istraživanjima kriminaliteta koja se razvijaju u svijetu i koja doprinose utvrđivanju i interpretaciji podataka o stanju kriminaliteta, na što je u zaključku posebno i ukazano.

Nakon višegodišnjeg praktičnog rada, a sagledavajući nedostatak istraživanja u oblastima vezanim za suprotstavljanje kriminalitetu u Bosni i Hercegovini, smatram da je materijal "Stanje i kretanje kriminaliteta u Bosni i Hercegovini za punoljetne osobe u periodu od 2003. do 2012. godine", važno učiniti dostupnim ne samo stručnoj javnosti nego i svima drugima.

Tuzla, 25.05.2013.godine

Vildana Helić, dipl pravnik  
sudija Kantonalnog suda u Tuzli

